



Broj/Број: 01/7-50-1-53-2-19/04
Sarajevo/Сарајево: 26.07.2004.

ZAPISNIK

sa 19-e sjednice Administrativne komisije Predstavničkog doma Parlamentarne skupštine Bosne i Hercegovine, održane u prostorijama institucija Bosne i Hercegovine dana 26.07.2004 godine sa početkom u 14,05 sati. Sjednica je završena u 15,00 sati.

SJEDNICI SU PRISUSTVOVALI ČLANOVI KOMISIJE: Jusufović Munib, Zorić Vinko, Kragulj Nikola, Felić Hazim, Ušanović Mubera, Ivo Miro Jović-koji se naknadno pridružio s obzirom da je imao sjednicu Ustavno-pravne komisije;

OPRAVDANO ODSUTNI ČLANOVI: Križanović Jozo, Novaković Momčilo, Blagojević Mirko;

OSTALI PRISUTNI: gosp Niko Grubešić zamjenik Ministra pravde; Jadranka Korać, Šef Računovodstva Sekretarijata Parlamentarne skupštine Bosne i Hercegovine;

Devetnaestom sjednicom, Administrativne komisije Predstavničkog doma Parlamentarne skupštine Bosne i Hercegovine, **predsjedavao je Munib Jusufović** Predsjedavajući Administrativne komisije Predstavničkog doma Parlamentarne skupštine Bosne i Hercegovine.

Za sjednicu je predložen slijedeći:

DNEVNI RED:

1. Usvajanje Zapisnika sa 18-e sjednice Administrativne komisije;
2. Prijedlog zakona o platama i naknadama nosilaca sudijske i tužilačke funkcije i državnih službenika i zaposlenika u Sudu i Tužilaštvu Bosne i Hercegovine;
3. Izvještaj o reviziji Parlamentarne skupštine Bosne i Hercegovine za 2003 godinu;
4. Izvještaj o izvršenju Budžeta sa 30.06.2004 godine i mogućnosti restrukturiranja troškova po zaključku sa 18-e sjednice Administrativne komisije Predstavničkog doma Parlamentarne skupštine Bosne i Hercegovine;
5. Informacija o poduzetim aktivnostima na izradi internih akata po zaključku sa 18-e sjednice Administrativne komisije Predstavničkog doma Parlamentarne skupštine Bosne i Hercegovine;
6. Informacija o zaključku Vijeća ministara po zaključku sa 17-e sjednice Administrativne komisije Predstavničkog doma Parlamentarne skupštine Bosne i Hercegovine;
7. Davanje odgovora na poslaničko pitanje koje je postavio poslanik Moranjić Muhamed na 41-oj sjednici Predstavničkog doma Parlamentarne skupštine održanoj 14. 07.2004;

Prije početka devetnaeste sjednice Administrativne komisije Predstavničkog doma Parlamentarne skupštine Bosne i Hercegovine, sekretar Administrativne komisije Davorka Čaplinski upoznala je prisutne, da su dobili prijedlog izmjena i dopuna dnevnog reda jer je poslaničko pitanje koje je postavio poslanik Moranjkić Muhamed dostavljeno nakon što su poslani pozivi za ovu sjednicu, pa je isto predloženo kao tačka AD-7.

Predsjedavajući Administrativne komisije je otvorio devetnaestu sjednicu i predložio dnevni red sa naprijed navedenom izmjenom. Pošto nije bilo drugih prijedloga izmjena ili dopuna dnevnog reda isti je dat na glasanje. Po usvajanju dnevnog reda devetnaeste sjednice Administrativne komisije Predstavničkog doma Parlamentarne skupštine Bosne i Hercegovine, pristupilo se razmatranju istog po usvojenim tačkama.

Devetnaesta sjednica Administrativne komisije nije snimana iz tehničkih razloga, odnosno sjednica je održana u rezervnoj sali budući da rezervisana sala sa obezbjeđenim snimanjem nije bila slobodna jer je u njoj još trajala sjednica druge komisije.

AD-1 Zapisnik sa osamnaeste sjednice Administrativne komisije usvojen je jednoglasno bez primjedbi.

AD-2 Po ovoj tački dnevnog reda konstatovano je da nije došao predlagač Zakona o platama i naknadama nosilaca sudijske i tužilačke funkcije i državnih službenika i zaposlenika u Sudu i Tužilaštvu Bosne i Hercegovine iako je uredno pozvan. Predsjedavajući Munib Jusufović je predložio da se ova tačka dnevnog reda odgodi za narednu sjednicu Administrativne komisije.

Nakon ovog prijedloga za riječ se javio Felić Hazim i predložio da Administrativna komisija donese zaključak, kojim bi se utvrdilo da Administrativna komisija neće razmatrati zakon ukoliko nije prisutan predlagač istog.

Vinko Zorić je nakon iznesenih prijedloga naglasio, da bi on prihvatio Prijedlog zakona o platama i naknadama nosilaca sudijske i tužilačke funkcije i državnih službenika i zaposlenika u Sudu i Tužilaštvu Bosne i Hercegovine.

Po ovom pitanju Munib Jusufović je istakao, da nije sporan Zakon, ali je sporan član 15 navedenog Zakona, pa je iz tih razloga predložio da se ne otvara rasprava po Prijedlogu zakona o platama i naknadama nosilaca sudijske i tužilačke funkcije i državnih službenika i zaposlenika u Sudu i Tužilaštvu Bosne i Hercegovine dok se ne obezbijedi prisustvo predlagača Zakona.

Sekretar Administrativne komisije Davorka Čaplinski upozorila je Komisiju da rok za razmatranje Prijedloga zakona o platama i naknadama nosilaca sudijske i tužilačke funkcije i državnih službenika i zaposlenika u Sudu i Tužilaštvu Bosne i Hercegovine ističe 30.07.2004 godine, te da o ovoj činjenici treba voditi računa jer će u protivnom Komisija morati tražiti produžetak roka za razmatranje citiranog Zakona.

Nakon ovog izlaganja predsjedavajući Administrativne komisije Munib Jusufović je predložio da se ova tačka odgodi za sjednicu Administrativne komisije koju treba zakazati za 28.07.2004 godine prije održavanja planirane zajedničke sjednice Administrativne komisije i Komisije za finansijske i administrativne poslove Doma naroda, a kojoj obavezno treba prisustvovati predlagač.

AD-3 Predsjedavajući Munib Jusufović je po ovoj tački dnevnog reda pozvao šefa Računovodstva Jadranku Korać da da obrazloženje. Imenovana je po ovoj tački dnevnog reda izjavila, da ona može samo odgovarati na pitanja ukoliko joj budu postavljena vezano za Izvještaj o reviziji Parlamentarne skupštine Bosne i Hercegovine za 2003 godinu.

Za riječ se javio Nikola Kragulj i istakao da se u Izvještaju nalaze uobičajene primjedbe, te da je teško sarađivati po pitanjima koja su navedena u Izvještaju, posebno naglasivši da će se u septembru ovo pitanje detaljnije razmatrati od nadležnih tijela Parlamentarne skupštine Bosne i Hercegovine. Smatra, da je u osnovi Izvještaj prihvatljiv, sa određenom rezervom kad su u pitanju manjkavosti utvrđene u instituciji Bosne i Hercegovine, uključno sa troškovima i njihovim praćenjem u Parlamentarnoj skupštini Bosne i Hercegovine.

U skladu sa naprijed navedenim Felić Hazim je podsjetio prisutne, da je peta tačka dnevnog reda u vezi sa trećom tačkom dnevnog reda, pa imajući to u vidu određene manjkavosti iznesene u Izvještaju Ureda za reviziju bit će otklonjene, odnosno nedostaci utvrđeni Izvještajem otklonit će se u skladu sa Prijedlogom plana koji je na današnjem dnevnom redu pod tačkom AD-5.

Na osnovu ove primjedbe, Jusufović Munib je naglasio da tačka AD-5 proističe iz tačke AD-3 dnevnog reda, pa se ova činjenica prima k znanju.

Kragulj Nikola je predložio, da se u vezi sa ovom tačkom dnevnog reda primi k znanju da je tačka AD-5 u vezi sa tačkom AD-3.

Na osnovu naprijed navedenog, Administrativna komisija je jednoglasno donijela

ZAKLJUČAK

Prima se k znanju Izvještaj o reviziji Parlamentarne skupštine Bosne i Hercegovine za 2003 godinu sa poduzetim mjerama na otklanjanju utvrđenih nedostataka.

AD-4 Po ovoj tački dnevnog reda uvodno izlaganje je dao Munib Jusufović istakavši, da se ovo pitanje već razmatralo na ranijim sjednicama Administrativne komisije, pa je Izvještaj za period januar-juni 2004 godine u većem dijelu poznat jer su samo nepoznati podaci za juni 2004 godine.

Nakon uvodnog izlaganja Felić Hazim je podsjetio prisutne, da su se na sjednicama Administrativne komisije već donijeli zaključci za ove vrste troškova. S obzirom da je prekoračenje izraženo na putnim troškovima i tu su doneseni zakljuci kojim je rečeno, da se putuje samo kad je to i gdje je to neophodno, odnosno, da se ti troškovi smanje, pa iz tih razloga ne vidi da je potrebno da se ista pitanja ponovo razmatraju po izvještaju za juni 2004 godine.

Po ranijim zaključcima Administrativne komisije, Jadranka Korać je pojasnila izvještaj i naglasila, da su izneseni iznosi dati sa oprezom, posebno naglasivši, da je bila na razgovoru kod pomoćnika Ministra za finansije i trezor koji ju je upozorio, da se moramo kretati u okvirima usvojenog Budžeta. Istakla je, da se prema njenim saznanjima ne može vršiti restruktuiranje troškova, dok bi se to moglo izvršiti na platama s obzirom da je planirani iznos do kraja godine 28.000 KM, pod uvjetom, da ne dođe do povećanja broja onih koji obavljaju po dva posla i za to primaju uvećane plate. Prema njenom izlaganju restruktuiranje bi se moglo izvršiti, ukoliko bi se ostvarile određene uštede na uslugama za prijevoz, gorivo i sl. Istakla je, da su velika stavka putovanja u Strazbur, odnosno troškovi na evropskim integracijama. Na toj poziciji ima 36.000 KM, pa uz sve mjere štednje na toj poziciji mogle bi se ostvariti određene uštede.

Nakon ovog izlaganja Nikola Kragulj je naglasio, da se na Administrativnoj komisiji iznijela informacija da smo prilikom usvajanja Budžeta odustali od amandmana na isti s tim, da se nedostatak sredstava za plaće pokrije iz rezervi, a nedostatak sredstava na putnim troškovima iz budžetske osnove.

Po ovom pitanju Munib Jusufović je podvukao, da veći broj osoba u Sekretarijatu Parlamentarne skupštine Bosne i Hercegovine prima praktično dvije plaće po osnovu obavljanja poslova i radnih zadataka u redovnom radnom vremenu. Naglasio je, da o ovom aktuelnom pitanju raspodjele poslova i radnih zadataka u Sekretarijatu nema podataka.

Jadranka Korać je podsjetila Predsjedavajućeg Administrativne komisije da je ove podatke Računovodstvo Sekretarijata Parlamentarne skupštine Bosne i Hercegovine na traženje Administrativne komisije dostavilo na prošloj sjednici.

Po ovom pitanju Nikola Kragulj je informisao Predsjedavajućeg Administrativne komisije da se ovo pitanje, iako je bilo na dnevnom redu, nije razmatralo na prošloj sjednici Administrativne komisije.

Munib Jusufović je po ovoj informaciji naglasio, da se Parlamentarna skupština Bosne i Hercegovine mora uklopiti u budžetske troškove. U vezi sa činjenicom da postoje osobe koje za rad u radnom vremenu primaju uvećane plaće, posebno je naglasio, zakonsku mogućnost preraspodjele radnog vremena i njeno nepoštivanje kad se radi o ovakvim pojavama uvećavanja plaća. Tu je

posebno podvukao kuloarske priče u Sekretarijatu Parlamentarne skupštine Bosne i Hercegovine po kojim, u naprijed navedenim slučajevima, ima dosta namještanja i favorizacije određenih osoba.

Po tom pitanju Jadranka Korać je iz pregleda koji je bio dostavljen za prošlu sjednicu Administrativne komisije samo izdvojila podatak, da imaju radna mjesta za dva nova sekretara koja nisu planirana jer su naknadno ustanovljena zakonima koji su usvojeni na Parlamentarnoj skupštini Bosne i Hercegovine, a za čije se obavljanje poslova i radnih zadataka izdvajaju određena sredstva osobama koji ih obavljaju na privremenoj osnovi.

Jusufović Munib je ponovo naglasio, da se radi o obavljanju poslova i radnih zadataka u redovnom radnom vremenu koje obavlja jedna osoba, a koja za obavljene posao u redovnom radnom vremenu prima uvećani iznos plaće. Istakao je, da je sporan upravo ovaj podatak, da se posao obavlja u redovnom radnom vremenu.

U okviru ove tačke dnevnog reda Nikola Kragulj je predložio, da Kolegij uputi pismo pomoćniku Ministra za finansije i trezor kako bi se izvršila intervencija da se pokrije nedostatak sredstava iz budžetske rezerve.

Po ovom pitanju za riječ se javio Felić Hazim i podsjetio prisutne, da se na prošloj sjednici Administrativne komisije govorilo o iznosu od 100.000 KM namijenjenih za troškove održavanja sjednica i putovanja, neuključujući podatke na ovoj stavci za mjesec juli. Predložio je, da Administrativna komisija donese zaključak kojim bi obavijestila Klubove poslanika o preraspodjeli sredstava na način kako je to u svojem izlaganju obrazložila Jadranka Korać.

Po izlaganju Hazima Felića, Munib Jusufović je tražio da se u septembru i oktobru prate ovi troškovi jer će se tad tačno znati kakva je situacija na pozicijama na kojim je došlo do prekoračenja budžetskih sredstava.

Na ovo izlaganje reprecirala je Jadranka Korać istakavši, da je Računovodstvo dalo tačan podatak o troškovima na poziciji putovanja.

Munib Jusufović je ponovo naglasio, da će se tačna situacija, kad se radi o prekoračenju budžetskih sredstava, znati po devetomjesečnom obračunu.

Nakon završene diskusije po ovoj tački dnevnog reda, Administrativna komisija je jednoglasno donijela

ZAKLJUČAK

Administrativna komisija Predstavničkog doma Parlamentarne skupštine Bosne i Hercegovine će u septembru mjesecu razmatrati izvršenje Budžeta za period 01.01.-30.09.2004 godine kada će se sagledati tačno stanje u izvršenju Budžeta za 2004-u godinu i na osnovu toga predložiti odgovarajuće mjere.

AD-5 Uvodno izlaganje po ovoj tački dnevnog reda dao je sekretar Administrativne komisije Davorka Čaplinski. Upoznala je prisutne sa mjerama koje su poduzete u Sekretarijatu po Izvještaju Ureda za reviziju kad se radi o internim aktima, kao i zaključcima sa 18-e sjednice Administrativne komisije. Istakla je, da se u materijalu za ovu tačku dnevnog reda nalazi Informacija o izradi internih akata koji su u postupku izrade ili donošenja, te da je potrebno odrediti razuman rok za njihovu izradu, ali i imati u vidu da su aktivnosti na izradi prečišćenog teksta Odluke o načinu obračuna plaća i ostalih materijalnih prava poslanika i delegata u Parlamentarnoj skupštini Bosne i Hercegovine broj: 01,02/7-126/00 od 11. aprila 2000 godine po tački 2.1.1. Izvještaja Ureda za reviziju zastale zbog tehničko-formalnih nedostataka koje trebaju da otklone Administrativna komisija Predstavničkog doma i Komisija za finansijske i administrativne poslove Doma naroda Parlamentarne skupštine Bosne i Hercegovine. Naglasila je, da se ovo pitanje nalazi na dnevnom redu planirane zajedničke sjednice obe komisije za 28.07.2004 godine kada bi se trebali otkloniti formalni nedostaci (neusaglašeni tekstovi zaključaka-bilo kad se radi o izradi prečišćenog teksta akta, bilo da se radi o pojedinim članovima tog akta) koji uslovljavaju zastoje na izradi prečišćenog teksta.

Po završenom uvodnom izlaganju po ovoj tački dnevnog reda, Felić Hazim je predložio da Administrativna komisija kao krajnji rok za donošenje akata navedenih u Informaciji utvrdi kraj septembra.

Na osnovu naprijed navedenog prijedloga Administrativna komisija Predstavničkog doma Parlamentarne skupštine Bosne i Hercegovine je jednoglasno donijela

ZAKLJUČAK

Utvrđuje se 30.09.2004 godine kao krajnji rok za donošenje internih akata po nalazu Ureda za reviziju i zaključcima sa 18-e sjednice Administrativne komisije Predstavničkog doma Parlamentarne skupštine Bosne i Hercegovine.

AD-6 Po ovoj tački dnevnog reda Administrativna komisija Predstavničkog doma Parlamentarne skupštine Bosne i Hercegovine je jednoglasno donijela

ZAKLJUČAK

Prihvata se Obavijest o zaključku Vijeća ministara po Zaključku sa 17-e sjednice Administrativne komisije Predstavničkog doma Parlamentarne skupštine Bosne i Hercegovine kojim je traženo da se dostavi informacija o početku radova na neboderu na Trgu Bosne i Hercegovine br. 1.

Po završenoj raspravi po tački AD-6 dnevnog reda na sjednicu Administrativne komisije je došao gosp Niko Grubešić zamjenik Ministra pravde kao predstavnik predlagača Zakona o platama i naknadama nosilaca sudijske i tužilačke funkcije i državnih službenika i zaposlenika u Sudu i Tužilaštvu Bosne i Hercegovine. Ispričao se Administrativnoj komisiji za zakašnjenje koje je nastalo zbog toga što je gosp Grubešić Niko ispred predlagača drugog zakona bio prisutan na sjednici Ustavno-pravne komisije Predstavničkog doma Parlamentarne skupštine Bosne i Hercegovine koja još traje. Zamolio je Administrativnu komisiju da uvaži ovo izvinjenje i da održi raspravu o Prijedlogu zakona o platama i naknadama nosilaca sudijske i tužilačke funkcije i državnih službenika i zaposlenika u Sudu i Tužilaštvu Bosne i Hercegovine kako je to utvrđeno usvojenim dnevnim redom.

Nakon ovog izlaganja, Administrativna komisija Predstavničkog doma Parlamentarne skupštine Bosne i Hercegovine je odlučila da se ponovo vrati na tačku AD-2 dnevnog reda i održi raspravu o o Prijedlogu zakona o platama i naknadama nosilaca sudijske i tužilačke funkcije i državnih službenika i zaposlenika u Sudu i Tužilaštvu Bosne i Hercegovine.

Ad-2 Uvodno izlaganje po ovoj tački dnevnog reda dao je zamjenik Ministra pravde gosp Niko Grubešić. U svojem izlaganju je istakao, da je Prijedlog zakona o platama i naknadama nosilaca sudijske i tužilačke funkcije i državnih službenika i zaposlenika u Sudu i Tužilaštvu Bosne i Hercegovine (u daljem tekstu: Prijedlog zakona) prošao svu potrebnu proceduru, uključno sa pribavljenim svim mišljenjima, o Prijedlogu zakona, institucija na koje se ovaj zakon odnosi, uz primjedbu predstavnika predlagača da je iz opravdanih razloga iz Prijedloga zakona izuzet Ustavni sud Bosne i Hercegovine. Predstavnik predlagača je upoznao prisutne sa činjenicom, da su prilikom izrade Prijedloga zakona konsultovani Sud i Tužilaštvo, te da su isti dostavili svoje primjedbe na Prijedlog zakona kojim su tražena mnogo veća prava nego ta koja su im data u Prijedlogu zakona. Prisutni na sjednici su informisani da se prilikom izrade Prijedloga zakona vodilo računa da je stupio na snagu Zakon o radu u institucijama Bosne i Hercegovine ("Sl. glasnik BiH," br.: 26/04), odnosno da su se uzeli u obzir član 1 stav 2 tačka a) citiranog Zakona koji glasi: **"Ovim zakonom regulira se radni odnos:**

a) zaposlenika u institucijama Bosne i Hercegovine koji su izričito izuzeti iz Zakona o državnoj službi u institucijama Bosne i Hercegovine ("Sl. glasnik BiH," br.: 19/04 i 35/03); " Po ovom pitanju zamjenik Ministra pravde je informisao članove Administrativne komisije da su neka pitanja riješena Poslovníkom Suda, odnosno Pravilnikom Tužilaštva, ali da obe institucije nisu stavljale primjedbe koje bi se ticale citiranih akata. Na osnovu ovog izlaganja predstavnik predlagača je naglasio, da je bila intencija pri izradi Prijedloga zakona da se riješe plaće sudija, a podsjetio je po tom pitanju i na zaključke Predsjedništva Bosne i Hercegovine kojim je utvrđeno, da Vijeće ministara treba riješiti zakonom plaće u izvršnoj vlasti, kao što je to zaključkom Predstavničkog doma utvrđeno za zakonodavnu vlast. Što se tiče naknada za državne službenike, odnosno zaposlenike u ovim institucijama, iste će se riješiti u skladu sa zakonom, a koeficijenti za ove kategorije će se utvrditi posebnim zakonom. Dok se ova pitanja ne riješe primjenjivat će se Odluka Vijeća ministara. Naknade sudija i tužilaca su ovim Prijedlogom zakona reducirane, a posebno naknade koje se odnose na smještaj, odvojeni život i sl. S obzirom da su plaće sudija i tužilaca u ovoj zemlji visoke predlagač zakona je reducirao Prijedlogom zakona naknade za citirane kategorije, a isto mišljenje je imao i OHR koji je također konsultovan pri izradi Prijedloga zakona. Na osnovu toga sudije i tužioci će imati pravo na naknade koje su utvrđene ovim Prijedlogom zakona.

Nakon uvodnog izlaganja o Prijedlogu zakona, predsjedavajući Administrativne komisije je zatražio od predstavnika predlagača pojašnjenje odredbi člana 2 Prijedloga zakona, odnosno koliko iznosi plaća određena po članu 2 i 3 Prijedloga zakona.

Na ovo pitanje predstavnik predlagača je odgovorio, da u skladu sa članom 2 i 3 Prijedloga zakona to znači, pod pretpostavkom da je neto prosječna plaća zaposlenika, 500 KM puta koeficijent 2,4 ili 2,4 prosječne plaće plus 50% i na to se obračunava minuli rad kako je to utvrđeno Prijedlogom zakona.

Na ovo izlaganje replicirao je Munib Jusufović i zatražio objašnjenje od predstavnika predlagača, kako će se institucije navedene u Prijedlogu zakona, donošenjem ovog zakona, moći uklopiti u sveopštu ekonomsko-socijalnu situaciju u zemlji, ako je prijedlog zakona kojim su regulisana prava poslanika i delegata izazvao već poznate burne reakcije javnosti, a naročito pisanja štampe?

Po ovom pitanju predstavnik predlagača je istakao, da je tačno da su plaće sudija i tužilaca velike, te da će nekom plaća izaći na iznos 5000 KM sa minulim radom, a nekom 4000 KM s tim da upravo iz tih razloga nemaju pravo na ostale naknade koje su izuzete ovim Prijedlogom zakona jer imaju pravo na druge naknade ustanovljene predloženim zakonom.

Munib Jusufović je na ovo izlaganje iznio podatak da je u R Hrvatskoj utvrđeno, da predsjednik suda ne može imati veću plaću od predsjednika države.

Zamjenik Ministra pravde je odgovorio da je zato u Prijedlogu zakona utvrđeno, da sudije i tužioci imaju pravo na regres za godišnji odmor u iznosu od 25% od posljednje plaće, te za slučaj smrti nosilaca sudijske, odnosno tužilačke funkcije ili člana njihove uže porodice na iznos od 50% od mjesečne plaće, ali nemaju pravo na troškove prijevoza, topli obrok, te prilikom odlaska u penziju imaju pravo na 50% plaće. Vezano za obrazlaganje Prijedloga zakona, predstavnik predlagača je između ostalog naveo, da je Ustavni sud Federacije Bosne i Hercegovine u Federaciji proglasio protivustavnom odredbu zakona kojom su smanjene plaće sudijama. Ovakvo stajalište se prema obrazloženju predstavnika predlagača zasniva na američkoj odredbi zakona, po kojoj se u toku radnog vijeka sudije, istom ne može smanjiti plaća, a koja je preuzeta i u zakonodavstvo Bosne i Hercegovine, dok se po istom pitanju u evropskim pravilima nebi trebao ugrožavati status sudija. Ujedno se po evropskim pravilima smatra, da se smanjivanjem plaća sudija upravo dira u njihov status. Pored ovih obrazloženja, zamjenik Ministra pravde je svoja izlaganja potkrijepio činjenicom, da su plaće i naknade zakonske kategorije planirane Budžetom, kao i to, da se sa istim složilo Ministarstvo za finansije i trezor, pa i sa tog aspekta ne vidi bilokakvih prepreka za usvajanje Prijedloga zakona.

Nakon ovog obrazlaganja zakonskih odredbi predsjedavajući Administrativne komisije Munib Jusufović je skrenuo pažnju na član 15 Prijedloga zakona kojim su regulisane penzije

nosilaca sudijske i tužilačke funkcije. Predložio je da se ovaj član briše iz Prijedloga zakona, a da se ovo pitanje riješi na identičan način kako bude ovo pitanje riješeno za najviše dužnosnike u Bosni i Hercegovini pri tome naglasivši, da nije nikakav problem, da se odredbama kojim se regulišu penzije visokih dužnosnika riješe i penzije nosilaca sudijske i tužilačke funkcije.

Po pitanju člana 15 Prijedloga zakona, predstavnik predlagača je naglasio, da se ovdje radi o odredbi koja je preuzeta iz entiteskih zakona kojim su ova pitanja riješana upravo na način kako je to utvrđeno članom 15 Prijedloga zakona. Zamjenik ministra je ujedno istakao, da bi se donošenjem predloženog zakona riješila zakonodavna oblast. Podvukao je, da su primjedbe nosilaca sudijske i tužilačke funkcije po pitanju ovog člana bile mnogo žešće, te da su tražili, da se u Prijedlog zakona unese odredba po kojoj se član 15 mora primjenjivati, kao i to, da se ovaj član ne može mijenjati nikakvim kasnijim zakonom.

Nakon ovog izlaganja javio se za riječ Felić Hazim i upozorio na član 5 Prijedloga zakona kojim je utvrđeno, da se plaća nosilaca sudijske i tužilačke funkcije ne može mijenjati tokom vršenja njihove funkcije.

Po ovom izlaganju za riječ se javio Zorić Vinko. Istakao je, da je on za to da Prijedlog zakona prođe na Administrativnoj komisiji, s tim, da se u članu 15 kaže, da će se pitanje penzija nosilaca sudijske i tužilačke funkcije urediti zakonom.

Replicirao je gosp Niko Grubešić naglasivši, da je ovo pitanje na identičan način riješeno entiteskim zakonima, tako da su se Prijedlogom zakona samo slijedila entitetska rješenja ovog pitanja.

Nakon ovog obrazloženja Predsjedavajući Administrativne komisije zatražio je mišljenje svih prisutnih članova komisije o Prijedlogu zakona i šta treba da dalje radi Administrativna komisija ? Nikola Kragulj i Vinko Zorić su se odmah izjasnili da su za to da se Prijedlog zakona na komisiji pusti u dalju proceduru, pa je Predsjedavajući Administrativne komisije isti dao na glasanje.

Administrativna komisija Predstavničkog doma Parlamentarne skupštine Bosne i Hercegovine, kao nadležna komisija nakon provedenog glasanja je:

1. Jednoglasno podržala načela predloženog zakona.
2. Konstatovala da amandmana na Prijedlog zakona nije bilo.
3. Jednoglasno prihvatila tekst Prijedloga zakona o platama i naknadama nosilaca sudijske i tužilačke funkcije i državnih službenika i zaposlenika u Sudu i Tužilaštvu Bosne i Hercegovine.
4. Konstatovala da je predloženi zakon neophodno donijeti.
5. U skladu sa članom 89 Poslovnika Predstavničkog doma Parlamentarne skupštine Bosne i Hercegovine za izvjestioca imenovala predsjedavajućeg Administrativne komisije Muniba Jusufovića.

AD-7 Administrativna komisija Predstavničkog doma Parlamentarne skupštine Bosne i Hercegovine, na postavljeno poslaničko pitanje poslanika Muhameda Moranjkića, je jednoglasno utvrdila slijedeći

ODGOVOR

Troškovi putovanja, kao i troškovi interne i eksterne reprezentacije iskazani pojedinačno nalaze se u tabelarnom dijelu koji Vam dostavljamo u prilogu.

Pošto je iscrpljen dnevni red, 19-a sjednica Administrativne komisije Predstavničkog doma Parlamentarne skupštine Bosne i Hercegovine je završena u 15,00 sati.

Sekretar
Administrativne komisije
Davorka Čaplinski

Za Predsjedavajući
Administrativne komisije
Munib Jusufović